

বেসরকারি পর্যায়ে নার্সিং কলেজ/নার্সিং প্রতিষ্ঠান স্থাপন ও নার্সিং কোর্স চালুকরণ নীতিমালা, ২০০৯ এর ৬.৫ ধারা মতে- প্রত্যেক বেসরকারি নার্সিং কলেজ/ইনস্টিটিউটের ৫(পাঁচ) শতাংশ আসন অসচ্ছল মেধাবী শিক্ষার্থীদের জন্য সংরক্ষিত থাকবে। উক্ত ধারার বিধান অনুযায়ী উপযুক্ত শিক্ষার্থী বাছাই করার লক্ষ্যে এ গাইডলাইন প্রণয়ন করা হলো।

০১. নামকরণ ও প্রযোজ্যতা

- ক) এ গাইডলাইন “বেসরকারি নার্সিং কলেজ/ইনস্টিটিউটের ডিপ্লোমা ইন নার্সিং সায়েন্স এন্ড মিডওয়াইফারি, ডিপ্লোমা ইন মিডওয়াইফারি ও বিএসসি ইন নার্সিং কোর্সে মেধাবী-অসচ্ছল কোটায় শিক্ষার্থী নির্বাচন গাইডলাইন” নামে অভিহিত হবে।
- খ) এ গাইডলাইন ২০২৫-২০২৬ শিক্ষাবর্ষে বেসরকারি নার্সিং কলেজ/ইনস্টিটিউটের ডিপ্লোমা ইন নার্সিং সায়েন্স এন্ড মিডওয়াইফারি, ডিপ্লোমা ইন মিডওয়াইফারি ও বিএসসি ইন নার্সিং কোর্সে ভর্তিচ্ছু শিক্ষার্থীদের জন্য প্রযোজ্য হবে।

০২. আবেদনের যোগ্যতা

মেধাবী-অসচ্ছল শিক্ষার্থীদের জন্য সংরক্ষিত আসনে ভর্তির জন্য আবেদনের যোগ্যতা নিম্নরূপ:

- ক) বেসরকারি নার্সিং কলেজ/ইনস্টিটিউটের মেধাবী-অসচ্ছল কোটায় সংরক্ষিত আসনে ভর্তিচ্ছু শিক্ষার্থীকে জাতীয়ভাবে অনুষ্ঠিত ডিপ্লোমা ইন নার্সিং সায়েন্স এন্ড মিডওয়াইফারি, ডিপ্লোমা ইন মিডওয়াইফারি ও বিএসসি ইন নার্সিং কোর্সের ভর্তি পরীক্ষায় উত্তীর্ণ হতে হবে।
- খ) শিক্ষার্থীর অভিভাবককে আর্থিকভাবে অসচ্ছল হতে হবে।

০৩. আবেদন প্রক্রিয়া

মেধাবী-অসচ্ছল শিক্ষার্থীদের জন্য সংরক্ষিত আসনে ভর্তির আবেদন প্রক্রিয়া হবে নিম্নরূপ:

- ক) মেধাবী-অসচ্ছল শিক্ষার্থীদের জন্য সংরক্ষিত আসনে ভর্তির লক্ষ্যে বেসরকারি নার্সিং শিক্ষা প্রতিষ্ঠানে ডিপ্লোমা ইন নার্সিং সায়েন্স এন্ড মিডওয়াইফারি, ডিপ্লোমা ইন মিডওয়াইফারি ও বিএসসি ইন নার্সিং কোর্সে ভর্তির পরীক্ষার ফলাফলের পর নির্ধারিত সময়সীমার মধ্যে অনলাইনে আবেদন করতে হবে।
- খ) ভর্তিচ্ছু শিক্ষার্থীগণকে সরকার নির্ধারিত ওয়েব লিংকে (<http://bnmc.teletalk.com.bd>) প্রবেশ করে আবেদন করতে হবে।
- গ) আবেদনে ভর্তিচ্ছু শিক্ষার্থীকে তার অভিভাবকের বাৎসরিক আয়, স্থাবর সম্পত্তির আর্থিক মূল্যমান এবং অন্যান্য তথ্য অনলাইন আবেদনের নির্ধারিত টাবে ড্রপ ডাউন বক্স হতে নির্ধারণ (Select) করে অঞ্জীকারনামায় ক্লিক করতে হবে।

০৪. নির্বাচন পদ্ধতি

(১) পূর্ণমান/ স্কোরিং:

মেধাবী-অসচ্ছল শিক্ষার্থীদের জন্য সংরক্ষিত আসনে শিক্ষার্থী বাছাইয়ের পূর্ণমান হবে ১০০, যার বিভাজন হবে নিম্নরূপ:

- (ক) জাতীয় ভাবে অনুষ্ঠিত ডিপ্লোমা ইন নার্সিং সায়েন্স এন্ড মিডওয়াইফারি, ডিপ্লোমা ইন মিডওয়াইফারি ও বিএসসি ইন নার্সিং কোর্সে ভর্তি পরীক্ষায় শিক্ষার্থীর প্রাপ্ত নম্বরের আলোকে নির্ধারিত নম্বর: ৬০
- (খ) শিক্ষার্থীর অভিভাবকের আর্থিক সক্ষমতার তথ্য ও বিবরণীর আলোকে নির্ধারিত নম্বর: ৪০।

(২) প্রাপ্ত নম্বর নির্ধারণ ও মূল্যায়ন:

- (ক) নার্সিং কলেজ/ইনস্টিটিউটে ভর্তিচ্ছু শিক্ষার্থীর ভর্তি পরীক্ষায় প্রাপ্ত নম্বরের সাথে ০.৬ গুণ করে ৪(১)(ক) অংশের নম্বর নির্ধারণ করা হবে। উদাহরণস্বরূপ, ১০০ নম্বরের ভর্তি পরীক্ষায় কোনো পরীক্ষার্থী ৯০ নম্বর প্রাপ্ত হলে এক্ষেত্রে তার প্রাপ্ত নম্বর হবে $৯০ \times ০.৬ = ৫৪$ ।

- (খ) ভর্তি পরীক্ষায় অর্জিত নম্বর ও দাখিলকৃত প্রমাণকের ভিত্তিতে মোট প্রাপ্ত নম্বর মূল্যায়ন করা হবে।

০৫. অভিভাবকের আর্থিক সক্ষমতার মানদণ্ড নির্ধারণ:

৪(১) (খ) অংশের স্কোর নিম্নরূপ প্রক্রিয়ায় নির্ধারণ করা হবে-

- (ক) মেধাবী-অসচ্ছল শিক্ষার্থীদের জন্য সংরক্ষিত আসনে ভর্তিচ্ছু শিক্ষার্থীর অভিভাবকের আর্থিক সক্ষমতার মাত্রা পরিমাপের জন্য নিম্নোক্ত মানদণ্ডসমূহ বিবেচ্য হবে:

- (i) পিতা, মাতা কিংবা আইনগত অভিভাবকের বার্ষিক আয়
- (ii) স্থাবর সম্পত্তির মূল্যমান
- (iii) সামাজিক নিরাপত্তা কর্মসূচির আওতাভুক্ত উপকারভোগীর/ প্রতিবন্ধী পিতামাতার/ বিধবা মাতার সন্তান/ এতিম শিক্ষার্থী কি না?
- (iv) সরকার নির্ধারিত দুর্গম এলাকার শিক্ষা প্রতিষ্ঠান হতে উত্তীর্ণ শিক্ষার্থী কি না?
- (v) সরকারি/আধা-সরকারি/স্বায়ত্তশাসিত প্রতিষ্ঠানসমূহের জাতীয় বেতনক্রমের ১৭-২০ তম গ্রেডের বেতনভুক্ত কর্মচারীর বা সমপর্যায়ের বেসরকারি প্রতিষ্ঠানে কর্মরত কর্মচারীর সন্তান অথবা ক্ষুদ্র ব্যবসায়ী/প্রান্তিক কৃষক/ মৎস্যজীবী/ অন্যান্য নিম্ন আয়ের শ্রমজীবীর সন্তান কি না?

(খ) অভিভাবকের বার্ষিক আয় বিবেচনায় মান নির্ধারণ:

অভিভাবকের বার্ষিক আয়ের ক্ষেত্রে পূর্ণমান হবে '১০' (দশ)। নিম্নে বর্ণিত ছকে প্রদত্ত আর্থিক মূল্যমান এর বিপরীতে নির্ধারিত মান অনুযায়ী অভিভাবকের বার্ষিক আয়ের ক্ষেত্রে শিক্ষার্থীর প্রাপ্ত নম্বর নির্ধারণ করা হবে:

অভিভাবকের বার্ষিক আয়: (পূর্ণমান -১০)

ক্রম	বার্ষিক আয় (টাকা)	নির্ধারিত নম্বর
০১	৩,৬০,০০০ এর উর্ধ্বে	০
০২	৩,০০,০০১- ৩,৬০,০০০	২
০৩	২,৪০,০০১-৩,০০,০০০	৪
০৪	১,৮০,০০১ – ২,৪০,০০০	৬
০৫	১,২০,০০১ - ১,৮০,০০০	৮
০৬	১,২০,০০০ বা এর নিম্নে	১০

বার্ষিক আয় নির্ধারণের ক্ষেত্রে পিতা, মাতা (যদি উপার্জনশীল হন) উভয়ের আয়, পিতা-মাতা না থাকলে পরিবারের অপর কোন উপার্জনশীল অভিভাবকের বা আইনগত কোন অভিভাবকের আয় গণ্য হবে।

(গ) অভিভাবকের স্থাবর সম্পত্তির আর্থিক মূল্যমানের মান নির্ধারণ:

শিক্ষার্থীর অভিভাবকের স্থাবর সম্পত্তির মূল্যমান বিবেচনায় মূল্যায়নের পূর্ণমান হবে '০৮' (আট)। নিম্নবর্ণিত ছকে প্রদত্ত আর্থিক মূল্যমান এর বিপরীতে নির্ধারিত মান অনুযায়ী অভিভাবকের স্থাবর সম্পত্তির মূল্যমান বিবেচনায় শিক্ষার্থীর প্রাপ্ত নম্বর নির্ধারণ করা হবে।

অভিভাবকের স্থাবর সম্পত্তির মূল্যমান: (পূর্ণমান -০৮)

ক্রম	আর্থিক মূল্যমান (টাকা)	নির্ধারিত নম্বর
০১	১৫,০০,০০০ এর উর্ধ্বে	০
০২	১২,০০,০০১ – ১৫,০০,০০০	১
০৩	৯,০০,০০১ – ১২,০০,০০০	২
০৪	৬,০০,০০১ - ৯,০০,০০০	৪
০৫	৩,০০,০০১ - ৬,০০,০০০	৬
০৬	৩,০০,০০০ বা এর নিম্নে	৮

(ঘ) সামাজিক নিরাপত্তা কর্মসূচির আওতাভুক্ত উপকারভোগীর/ প্রতিবন্ধী পিতামাতার/ বিধবা মাতার সন্তান/ এতিম শিক্ষার্থীর ক্ষেত্রে পূর্ণমান হবে '১০' (দশ)।

[উদাহরণস্বরূপ, কোনো শিক্ষার্থী সামাজিক নিরাপত্তা কর্মসূচির আওতাভুক্ত উপকারভোগীর/ প্রতিবন্ধী পিতামাতার/ বিধবা মাতার সন্তান/ এতিম হলে শিক্ষার্থীর প্রাপ্ত নম্বর হবে '১০', অন্যথায় '০']

[উল্লিখিত ক্ষেত্রে পিতা অথবা মাতা অথবা বৈধ অভিভাবকের যে কোনো একজনের কার্ড/সনদ বিবেচিত হবে।]

(ঙ) সরকার নির্ধারিত দুর্গম এলাকার শিক্ষা প্রতিষ্ঠান হতে উত্তীর্ণ শিক্ষার্থীর ক্ষেত্রে পূর্ণমান হবে '০৪' (চার)।

[উদাহরণস্বরূপ, কোনো শিক্ষার্থী যদি সরকার নির্ধারিত দুর্গম এলাকার শিক্ষা প্রতিষ্ঠান হতে উত্তীর্ণ হয় তাহলে তার প্রাপ্ত নম্বর হবে '০৪', অন্যথায় '০']

(চ) সরকারি/আধা-সরকারি/স্বায়ত্তশাসিত প্রতিষ্ঠানসমূহের জাতীয় বেতন স্কেলের গ্রেড ১৭-২০ এর বেতনভুক্ত কর্মচারীর বা সমপর্যায়ের বেসরকারি প্রতিষ্ঠানে কর্মরত ব্যক্তির সন্তান অথবা ক্ষুদ্র ব্যবসায়ী/প্রান্তিক কৃষক/ মৎস্যজীবী/ অন্যান্য নিম্ন আয়ের শ্রমজীবীর সন্তানের ক্ষেত্রে পূর্ণমান হবে '০৮' (আট)।

[উদাহরণস্বরূপ, কোনো ভর্তিচ্ছু শিক্ষার্থী যদি সরকারি/আধা-সরকারি/স্বায়ত্তশাসিত প্রতিষ্ঠানসমূহের জাতীয় বেতন স্কেলের গ্রেড ১৭-২০ এর বেতনভুক্ত কর্মচারীর বা সমপর্যায়ের বেসরকারি প্রতিষ্ঠানে কর্মরত ব্যক্তির সন্তান অথবা ক্ষুদ্র ব্যবসায়ী/প্রান্তিক কৃষক/ মৎস্যজীবী/ অন্যান্য নিম্ন আয়ের শ্রমজীবীর সন্তান হয়, সেক্ষেত্রে শিক্ষার্থীর প্রাপ্ত নম্বর হবে '০৮', অন্যথায় '০']

[উল্লিখিত ক্ষেত্রে পিতা অথবা মাতা অথবা বৈধ অভিভাবকের যে কোনো একজনের পেশা বিবেচিত হবে।]

০৬. ভর্তিচ্ছু শিক্ষার্থীর অভিভাবকের আর্থিক সচ্ছলতা সংক্রান্ত প্রমাণক দাখিল এবং যাচাইকরণ:

ভর্তিচ্ছু শিক্ষার্থীর অভিভাবকের আর্থিক সচ্ছলতা পরিমাপের ক্ষেত্রে নিম্নলিখিত প্রমাণকসমূহ দাখিল করতে হবে;

- ক) স্থাবর সম্পত্তির মূল্যমানের প্রমাণকের জন্য সংশ্লিষ্ট সহকারী কমিশনার (ভূমি)/ইউনিয়ন পরিষদ/ পৌরসভা/ সিটি কর্পোরেশন কর্তৃক প্রদত্ত প্রত্যয়নপত্র;
- খ) বার্ষিক আয়ের সপক্ষে সংশ্লিষ্ট ক্ষেত্রে ব্যাংক হিসাব/ বেতন বিবরণী/ অন্য কোন গ্রহণযোগ্য প্রমাণক;
- গ) সামাজিক নিরাপত্তা কর্মসূচির আওতাভুক্ত উপকারভোগী/ প্রতিবন্ধী পিতামাতার/ বিধবা মাতার সন্তানের ক্ষেত্রে সংশ্লিষ্ট কর্তৃপক্ষের ইস্যুকৃত সামাজিক নিরাপত্তা কার্ড/ উপযুক্ত প্রমাণক;
- ঘ) দুর্গম এলাকার শিক্ষা প্রতিষ্ঠান হতে উত্তীর্ণ শিক্ষার্থীদের জন্য মন্ত্রিপরিষদ বিভাগের ১৯/০২/২০১৯ তারিখের ০৪.০০.০০০০.৫১২.৩৫.০১১.১৭.৭৬ সংখ্যক প্রজ্ঞাপনে নির্ধারিত দুর্গম এলাকার তালিকা অনুযায়ী তথ্য অনলাইনে আবেদন ফর্মের ডপডাউনে নির্বাচন করতে হবে;
- ঙ) এতিম শিক্ষার্থী প্রমাণের জন্য স্থানীয় সমাজসেবা কার্যালয়ের প্রত্যয়নপত্র;
- চ) অন্যান্য শ্রমজীবী/ নিম্ন আয়ের মানুষের ক্ষেত্রে সংশ্লিষ্ট ইউনিয়ন পরিষদ/ পৌরসভা/ সিটি কর্পোরেশন কর্তৃক প্রদত্ত উপযুক্ত প্রমাণক (এ ক্ষেত্রে কোন প্রকার এফিডেভিট/নোটারী পাবলিকের ঘোষণাপত্র প্রযোজ্য হবে না);
- ছ) বাবা-মায়ের পেশা যাচাইয়ের জন্য আবেদন ফর্মে NID নম্বর সংযোজন করতে হবে;
- জ) সরকারি/আধা-সরকারি/স্বায়ত্তশাসিত প্রতিষ্ঠানসমূহের জাতীয় বেতন স্কেলের গ্রেড ১৭-২০ এর বেতনভুক্ত কর্মচারী বা সমপর্যায়ের বেসরকারি প্রতিষ্ঠানে কর্মরত ব্যক্তির নিয়ন্ত্রণকারী কর্তৃপক্ষ কর্তৃক প্রদত্ত আয় সংক্রান্ত প্রত্যয়ন/বার্ষিক বেতন বিবরণী/ব্যাংক হিসাব বিবরণী/পেনশন বিবরণী (প্রযোজ্য ক্ষেত্রে) দাখিল করতে হবে।


০৭. মেধাবী-অসচ্ছল কোটায় শিক্ষার্থী নির্বাচন চূড়ান্তকরণ:

- ক) মেধাবী-অসচ্ছল শিক্ষার্থীদের জন্য সংরক্ষিত আসনে আবেদনকারীদের মধ্য হতে অনুচ্ছেদ ০৪ এর আলোকে অভিভাবকের আর্থিক সচ্ছলতা বিবেচনায় প্রাপ্ত নম্বর এবং ভর্তি পরীক্ষার প্রাপ্ত নম্বর এর ভিত্তিতে মেধাবী-অসচ্ছল শিক্ষার্থীদের সংরক্ষিত আসনের জন্য নিজ জেলা উল্লেখপূর্বক কেন্দ্রীয় ভর্তি কমিটি কর্তৃক নির্ধারিত সংখ্যক শিক্ষার্থীর প্যানেল প্রস্তুত করে বাংলাদেশ নার্সিং ও মিডওয়াইফারি কাউন্সিল স্বাস্থ্য শিক্ষা ও পরিবার কল্যাণ বিভাগের অনুমোদনক্রমে ওয়েবসাইটে প্রকাশ করবে।
- খ) নার্সিং কলেজ/ইনস্টিটিউটের মেধাবী-অসচ্ছল শিক্ষার্থীদের জন্য সংরক্ষিত আসনে ভর্তির জন্য নির্বাচিত শিক্ষার্থীদের তথ্য উপজেলার ইউএনও/ইউএফপিও/উপজেলা পর্যায়ের অন্যকোন গেজেটেড কর্মকর্তার মাধ্যমে যাচাইকরণ করতে হবে।
- গ) নার্সিং কলেজ/ইনস্টিটিউটের মেধাবী-অসচ্ছল শিক্ষার্থীদের জন্য সংরক্ষিত আসনে ভর্তির জন্য নির্বাচিত শিক্ষার্থীদের তালিকা উক্ত প্রতিষ্ঠানের গর্ভনিং বডি/ম্যানেজমেন্ট কমিটি কর্তৃক চূড়ান্ত করে বাংলাদেশ নার্সিং ও মিডওয়াইফারি কাউন্সিল এবং স্বাস্থ্য শিক্ষা ও পরিবার কল্যাণ বিভাগে প্রেরণ করতে হবে।

ঘ) মেধাবী-অসচ্ছল শিক্ষার্থীদের জন্য সংরক্ষিত আসনে ভর্তিচ্ছু শিক্ষার্থীর দাখিলকৃত তথ্য/ দালিলিক প্রমাণক মিথ্যা বা ভুল প্রমাণিত হলে তার আবেদন/কলেজ মনোনয়ন বাতিল বলে গণ্য হবে।

০৮. বিবিধ

- (ক) বেসরকারি নার্সিং কলেজ/ইনস্টিটিউটসমূহে মেধাবী-অসচ্ছল শিক্ষার্থীদের সংরক্ষিত আসনে ভর্তির জন্য ভর্তি পরীক্ষার আবেদনে উল্লিখিত তথ্যাবলী কেন্দ্রীয়ভাবে নির্ধারিত সফটওয়্যার দ্বারা স্বয়ংক্রিয়ভাবে যাচিত হবে।
- (খ) স্বাস্থ্য শিক্ষা ও পরিবার কল্যাণ বিভাগ এই গাইডলাইনের শর্তসমূহ সময়ে সময়ে যৌক্তিকভাবে পুনঃ নির্ধারণ করতে পারবে।
- (গ) এই গাইডলাইনে উল্লেখ নাই এমন কোন বিষয়ে স্বাস্থ্য শিক্ষা ও পরিবার কল্যাণ বিভাগ এর সিদ্ধান্ত চূড়ান্ত বলে গণ্য হবে।


স্বাক্ষরিত- ২৩/০৮/২৬

(মো: সাইদুর রহমান)

সচিব

স্বাস্থ্য শিক্ষা ও পরিবার কল্যাণ বিভাগ